

Desgrazi de Giovannin Bongee

De già, lustrissem, che semm sul descors
De quij prepotenti de Frances,
Ch'el senta on poo mò adess cossa m'è occors
Jer sira, in tra i noeuv e mezza e i des,
Giust in quell'ora che vegneva via,
Sloffì e stracch come on asen, de bottia.

S'eva in contrada de Santa Margaritta
E andava inscì, bell bell, come se fa,
Ziffoland de per mi su la mia dritta,
E quand sont lì al canton dove ghe sta
Quel pessee che gh'ha foeura i bej oliv,
Me senti tutt a on bott a di: Chi viv ?

Vardi inanz, e hoo capii de l'infilera
Di cardón e del strèpet di sciavatt
Che s'eva daa in la rondena, e che l'era
La rondena senz'olter di crovatt ;
E mì, vedend la rondena che ven,
Fermem lì senza moeuvem: vala ben ?

Quand m'hin adoss, che asquas m'usmen el fiaa,
El primm de tucc che l'eva el tamborin,
Traccheta! sto asnon porch del Monferaa
El me sbaratta in faccia el lanternin
E el me fa vedè a on bott só, luna, stell,
A ris'c de inorbimm lì come on franguell.

S'era tanto dannaa de quella azion
Che dinguarda s'el fudess staa on olter !
Basta, on scior ch'eva in pari a sto birbon,
(Ch'el sarà staa el sur respettor senz'olter),
Dopo avemm ben lumaa, el me dis: Chi siete ?
Che mester fate ? In dove andee ? Dicete !

Chi sont ? respondi franco, in dove voo ?
Sont galantomm e voo per el fatt mè;
Intuitù poeu del mestee che foo,
Ghe ven quaj cossa de vorrell savè ?
Foo el cavalier, vivi d'entrada, e mò
Ghe giontaravel fors quajcoss del sò ?

Me par d'avegh parlaa de fioeu polid;
N'eel vera ? e pur, fudessel ch'el gh'avess
Ona gran volentaa de taccà lid,
O che in quel dì gh'andass tusscoss in sbiess,
El me fa sercià sù de vott o des,
E lì el me sona on bon felipp de pes.

Hoo faa mi do o tre voeult per rebeccamm.
Tant per respondegh anca mi quejcoss,
Ma lu el torna de cap a interrogamm
In nomo de la legge e el salta el foss ;
E in nomo de la legge - già, se sa
Sansessia, vala ben ? - boeugna parlà.

E lì botta e risposta, e via d'incant:

Chi siete ? - Giovannin. - La parentela ? -
Bongee. - Che mester fate ? - El lavorant
De frust. - Presso de chi ? De Isepp Gabella. -
In dove ? - In di Tegnon. - Vee a spass ? - Voo al cobbi. -
In cà de voi ? - Sur sì. - Dove ? - Al Carrobbi.

Al Carrobbi ! - In che porta ? - Del piattee. -
Al numer? - Vottcent vott. - Pian ? - Terz... E inscì
Eel satisfaa mò adess; gha n'hal assee ?...
Fussel mò la franchezza mia de mì,
O ch'el gh'avess pu nient de domandamm
El va e el me pienta lì come on salamm.

Ah, lustrissem, quest chì l'è anmò on sorbett,
L'è un zuccher fioretton resguard al rest;
El sentirà mò adess el bel casett
Che gh'era pareggiaa depòs a quest:
Propi vera, lustrissem, che i battost
Hin pront come la tavola di ost.

Dopo sto pocch viorin, gris come on sciatt,
Corri a cà che no vedi nanch la straa;
Foo per dervì el portell, e el troeuvì on tratt
Nient olter che avert e sbarattaa...
Sta a vedè, dighi subet, che anca chì
Gh'è ona gabola anmò contra de mì.

Magara inscì el fudess staa on terna al lott,
Che almanch sta voeulta ghe lassava el segn !
Voo dent... ciappi la scara... stoo lì on bott,

Doo a ment... e senti in sui basij de legn,
Dessora inscìma, arent al spazzacà,
Come sarav on sciabel a soltà.

Mi a bon cunt saldo lì: fermem del pè
De la scara... e, denanz de ris'cià on pien
Col fidamm a andà sù, sbragi: « Chi l'è ? ».
Coss'en disel, lustrissem, vala ben ?
A cercà rognà inscì per spassass via,
Al dì d'incoeu s'è a temp anch quand se sia.

Intant nissun respond; e sto tricch tracch
El cress, anzi el va adree a vegnì de bass...
Ghe sonì anmò on « Chi l'è ? » pu masiacch,
Ma oh dess, l'è pesg che ne parlà coi sass!
infin poeu a quante mai sbragi: Se pò
Savè, chi l'è ona voeulta, s'è o nò ?

Cristo, quanti penser hoo paraa via
In quell'atem che s'eva adree a sbragià!
M'è fina vegnuu in ment - esussmaria ! -
Ch'el fuss el condan reficció de cà,
Ch'el compariss lì inscì a fà penitenza
De quij pocch ch'el s'è tolt su la conscienza.

El fatt l'è ch'el freccass el cress anmò,
E senti ona pedana, oltra de quell,
Propi d'ona persona che ven giò;
Mi, allora, tirem lì attach al portell,
Che de reson, s'el se le voeur cavà,

L'ha de passà de chì, l'ha de passà.

Ghe semm nun chì al busilles ! Finalment

Vedi al ciar de la lampeda de straa

Avegnimm a la contra on accident

D'on cavion frances de quij dannaa,

Che inscì ai curt el me diss: Ett vô el marì

De quella famm che sta dessora li ?

Mi, muso duro tant e quant e lù,

Respondi: Ovì gè suì moà; perché ?

Perchè, el repia, voter famm, monsù,

L'è tre giolì, sacher dioeu, e me plè.

0 giolì o non, ghe dighi, l'è la famm

De moà de mi: coss'hal mò de cuntamm ?

S'è che moà gè voeù coccè con ell.

Coccè ? respondi, che coccé d'Egitt ?

Ch'el vaga a fà coccé in San Raffaje 11 ;

Là l'è el loeugh de coccè s'el gh'ha el petitt !

Ch'el vaga foeura di cojon, che chì

No gh'è coccé che tegna: avè capì ?

Cossa dianzer ghe solta, el dis: Coman,

A moà cojon?... e el volza i man per damm.

Ovej, ch'el staga requi cont i man,

Ch'el varda el fatte sò de no toccamm,

Se de nò, dia ne libra, sont capazz...

E lu in quel menter mollem on scopazz.

E voeuna, e dò ! Sangua de dì de nott,
Che nol se slonga d'olter, che ghe doo !
E lu zollem de capp on scopellott!
Vedi ch'el tend a spettasciamm el coo,
E mi sott cont on anem de lion ...
E lu, tonfeta, on olter scopazzon !

Ah sanguanon! A on colp de quella sort
Me sont sentuu i cavij a drizzà in pee,
E se nol fudess staa che i pover mort
M'han juttaa per soa grazia a tornà indree,
Se no ciappi on poo d'aria, senza fall
Sta voeulta foo on sparposet de cavall.